

Aruba Lions Club a lansa proyecto musical



ORANJESTAD - Diamars anochi na clubhuis di Aruba Lions Club den presencia di diferente artistanan local, e leonnan a lansa un proyecto musical pa prome biaha, un disco compacto cu lo sirbi pa yuda Aruba Lions Club cu su fondonan pa yuda comunidad.

Aruba Lions Club den ultimo tempo ta saliendo hopi padilanti cu diferente proyectonan pa comunidad tanto pa nos muchanan y tambe nos grandinan y sigur cu mas proyectonan hopi interesante na caminda.

Den cuadro di 72 aña di existencia di Aruba Lions Club y apoyando nos artistanan

local, esaki ta un proyecto caminda e agrupacion musical Melodia a acompaña 7 diferente cantante local bon conoci den comunidad, pa haci un gesto na e club pa por recauda fondo cu esaki.

Un disco compacto cu ta hiba e nomber "Caribbean Vibes" cu 8 tema musical popular cu ritmonan Latino y Caribense bon varia manera merengue, Cadanse, Soca, Vallenato y mas. Locual sigur ta haci e produccion aki asina atractivo ta cu tur ta canticanan presenta pa Melodia cu su zonido cu e toke crioyo y canta pa entre otro; Richard "Tattoo" Quand, Robert Maduro, Cecilito Lopes, Ito Dania, Claudius Phillips, Robert Jeand'or, Inky Richardson y na final un cancion caminda diferente di e cantantenan aki lo interpreta.

Tanto pa e grupo Melodia cu ta un placer y honor pa por a participa den e proyecto aki hunto cu e legendarionan aki, sigur pa cada un cantante

tambe e ta un placer pa por a yuda den un proyecto uzando nan talento caminda cu e fondonan ta bay bek den comunidad.

Aruba Lions Club ta proba pa felicitá y gradici Lion Rubin Ponson cu a haci e produccion aki posibel y na mes momento tur integrante di grupo Melodia cu un bunita trabou mescos pa cada un di e cantantenan cu nan voz magistral y unico.

Tambe un palabra di danki ta bay na e sponsornan cu a cubri e gastonan di e prome lote di CD.

Pa solamente 25 florin bo por tin un di e disconan aki

cu no por falta den bo coleccion di musica y ta obtenibel cerca tur miembro di Aruba Lions Club of via nan facebook page y tambe na mayoria di e pomp-station nan na Aruba. Motibo pa bo tin un di e CD nan aki ta cu bo tambe por contribui na apoya nos artistanan local y mantene nos cultura bibo, sin duda bo tin un produccion cu musica bon varia bailabel y alegre y pa no lubida cu compra di cada disco bo ta aporta grandemente na Aruba Lions Club caminda cada florin ta bay bek den proyectonan pa comunidad.

Un bunita recuerdo di Aruba Lions Club su 72 Aniversario pa abo tambe tin.

